

**Najib takut 'kekebalan' Dr M, dakwa PAS  
MalaysiaKini.com  
23 November, 2012**

PAS mendakwa Perdana Menteri, Datuk Seri Najib Abdul Razak takut dengan 'kekebalan' mantan perdana menteri Tun Dr Mahathir Mohamad yang didakwa parti itu terus menerus membelasah musuh politiknya 'tidak kira masa dan tempat'.

"Datuk Seri Najib mesti ikut apa kemahuannya dan tidak berani menyanggah apa yang beliau kata, takut banyak pula fail-fail beliau timbulkan," dakwa ahli jawatankuasa pusat PAS, Idris Ahmad.

Siapa yang berani sanggah, alamat gelap masa depan di dalam politik, dakwa Idris dalam satu kenyataan hari ini.

"Contohnya, Tun Abdullah Badwi yang berani membatalkan projek Jambatan Bengkong, sampai hari ini beliau dendam dan membelasah Tun Abdullah tidak kira masa dan tempat," dakwanya lagi.

Kekebalan tersebut, dakwa Idris lagi, membolehkan Dr Mahathir terlepas selepas mendakwa Umno adalah syaitan yang dikenali dan menggelar pembangkang 'Malaikat yang tidak dikenali' dan malah membuat kenyataan bahawa Malaikat juga membuat salah.

Malangnya, dakwa Idris lagi, 3.5 juta ahli Umno tidak menyanggah kenyataan Dr Mahathir itu, dan juga tidak kedengaran ulama Umno menegur kenyataannya itu.

Setakat hari ini, tambahnya, yang berani menyanggah beliau adalah pemimpin PAS dan Pakatan Rakyat sahaja.